

→ MASYARAKAT

Syor wujud zon durian elak lambakan, kawal harga

→ Pakar biak baka tumbuhan muhu faktor cuaca diambil kira

Oleh Ilah Hafiz Aziz
illahhafiz.abdulaziz@bh.com.my

■ Kuala Lumpur

Kerajaan perlu mewujudkan kawasan penanaman durian mengikut zon bagi mengelak lambakan hasil akibat pengeluaran serentak, sekali gus menjelaskan harga raja buah itu di pasaran.

Pakar biak baka dan genetik tumbuhan, Prof Dr Ghizan Saleh, berkata faktor kepelbagaiannya keadaan cuaca perlu diambil kira dalam mengenal pasti lokasi penanaman baharu mengikut zon itu berikutnya cuaca membawa pengaruh besar kepada musim pengeluaran durian di negara ini.

"Durian adalah buah bermusim, tetapi cuaca yang tepat mempengaruhi pengeluarannya dan itu

terjadi beberapa bulan lalu apabila semua lokasi mempunyai kadar cuaca sama.

Harga jadi rendah

"Keadaan ini, menyebabkan buah masak serentak sedangkan faktor cuaca bukanlah sesuatu yang kita boleh kawal. Jika ini berlaku (pengeluaran hasil serentak dalam jumlah banyak) harga sudah pasti rendah dan ia (harga) akan melambung jika pengeluaran sedikit dalam tempoh lain. Ia kerugian untuk semua pihak," katanya kepada BH.

Statistik Tanaman (Sub Sektor Tanaman Makanan) 2017 dieluarkan Jabatan Pertanian merekodkan pengeluaran 242,117 tan metrik (mt) durian pada 2017 melalui 66,104 hektar kawasan penanaman, dengan tiga negeri pengeluar utama iaitu Pahang, Jo-

hor dan Kelantan.

Ketika ini harga durian biasa dianggar serendah RM10, manakala Musang King pula pada kadar RM33 sekilogram.

Berbanding hari biasa, Musang King dijual pada harga antara RM50 hingga RM70 sekilogram ber-gantung gred, D101 dan D24 mencapai RM25 hingga RM35 sekilogram, D2 (RM20 hingga RM30) dan durian kampung antara RM15 hingga RM25 sekilogram.

Dr Ghizan yang juga pensyarah Fakulti Pertanian Universiti Putra Malaysia (UPM) berkata, pelan jangka panjang penting untuk memastikan petani yang mengusahakan kebun atau ladang durian tidak menanggung kerugian besar sekiranya pengeluaran buah itu di seluruh negara berlaku serentak seperti yang berlaku ketika ini.

"Ketika ini produk berkaitan du-

rian dalam pasaran kita masih kecil berbanding Thailand...negara jiran itu juga mengeluarkan durian yang banyak, tetapi mereka bukan saja mengeksport sebaliknya mengusahakan banyak produk berdasarkan raja buah itu.

"Di Thailand apabila berlakunya pengeluaran serentak, ia boleh dijenamakan dengan pelbagai produk dan ia berlainan dengan industri negara apabila produk berdasarkan durian masih belum dimaksimumkan termasuklah durian sejuk beku," katanya.

Harga masih menguntungkan
Sementara itu Pemangku Timbalan Ketua Pengarah (Operasi) Lembaga Pemasaran Pertanian Persekutuan (FAMA), Mohd Anis Mohd Yasin, menegaskan harga durian ketika ini masih menguntungkan petani walaupun ia didakwa jatuh

teruk ketika ini.

Malah beliau turut menafikan kemasukan durian dari negara jiran sebagai punca kejatuhan harga, kerana buah dari Thailand hanya diimport sekiranya tiada pengeluaran tempatan.

"Waktu pengeluaran dua tahun sebelum ini durian kampung dijual pada harga antara 50 sen hingga RM1 sekilogram di ladang, manakala durian klon dalam lingkungan RM3 hingga RM5 sekilogram dan Musang King pula dalam lingkungan RM10 hingga RM12 sekilogram.

"Jika harga lama (pengeluaran dua tahun lalu) itu berulang, maka ia barulah dikatakan jatuh teruk dan harga durian yang rendah ketika ini disebabkan pengeluaran buah yang menjadi dibandingkan tahun sebelumnya," katanya.



Orang ramai tidak melepaskan peluang untuk membeli durian di Batu Tiga, Jalan Gambang, Kuantan.